

2 Pegodo

cadota ante nänö ayænta yewæmongainta

Wængongui mînitö imînite waa cæcæcäimpa, ante

1 ¹ Botö Timönö Pegodo inömo inte Itota Codito ingante në cædömö iñömote tömengä botö imote da godongä godinque botö tömengä beyæ në apænebo bagaboimpa. Mönö Wængongui inongä inte Itota Codito iñömö mönö imonte, Quëwencæminimpa, ante në Ængaingä ingampa. Tömengä iñömö mönitö imönite pönö cædinque, Mîni wede pönönö ante waa pönî entawencæminimpa, ante pönongä ænimöni inte entawëmönipa. Ayæ adobai tömengä në nö pönî cædongä inte mînitö imînite pönongä æninque mînitö mönitö entawënö bai ado mîni wede pönönö ante edæ waa pönî entawëmînipa. Ininque mînitö imînite botö, Acæminimpa, ante yewæmömopa. ² Mînitö Wængongui ingante pönëninque Itota Codito mönö Awënë ingante adobai pönëninque tömëna inate edæ ate bai pönencæminimpa, ämopa. Ayæ tömëna godömenque pönö cæda ate mînitö tömëna nana gänë pönönö ante edæ eyepæ pönî entawencæminimpa, ante botö yewæmömopa.

Codito nänö në emîñæmö inte mönö iïmai entawëmompa

³ Itota Codito iñömö, Në waa cæbo inte botö ñäö emömo iñömote pöedäni, ante mönö imonte do aa pecä pömompa. Mänömaï Itota Codito weca pöñömote tömengä Wængongui nänö tæï pîñæmämö entawënogä inte, Quëwëedäni, äninque eyepæ

pönö cæcä ænte quëwëninque mönö tömengä awinca ate bai pönëninque tömengä nänö waa cædö bai edæ adobai mönö waa cæmö bamompa. ⁴ Tömengä në waa cædongä inte edæ ñäö bai emöninque, Botö godömenque nanguï cædinque waa pönî edæ pönö cæcæboimpa, ante edæ wæætë wæætë angacäimpa. Ininque mînitö iñömö tömengä nänö angäinö ante wede pönëñömînite Wængongui tömengä nänö entawënö pönongä æninque mînitö Wængongui nänö entawënö bai adobai entawencæminimpa. Ayæ mänîne ante wede pönëninque mînitö inguiopaga quëwëninque wënæ wënæ mönö cæinente wægaiñö ante, Nömænte bacæ wæ, ante wædinque Baa ante edæ aamö cæcæminimpa.

⁵ Codito mänömaï pönö cæcä beyæ mînitö wede pönëmîni inte në waa cæmîni bacæte ante cöwë edæ pæ pagænte cæedäni. Ayæ wææ në waa cæmîni badinque Æbänö cæte nö cæquïi, ante ëñëmîni bacæte ante nanguï cæedäni. ⁶ Ayæ wææ mänömaïñö ante mînitö në ëñëmîni badinque godömenque nanguï cædinque nämä wææ aamîni bacæte ante cæedäni. Ayæ wææ nämä wææ aamîni badinque wæætë në wæntædämaï inte ee cæmîni bacæte ante cæedäni. Ayæ wææ në wæntædämaï inte ee cæmîni badinque mînitö wæætë Wængongui nänö ante entawënö bai entawëninque tömengä nänö cædö cæte quëwencæte ante cæedäni. ⁷ Ayæ wææ Wængongui nänö cædö bai cæte quëwëmîni badinque mînitö ayæ, Mönö caipæ,

ante godongämæ mini waa cæcabo bacæte ante cæedäni. Ayæ wææ mini godongämæ waa cæcabo bamini inte minitö ayæ waodäni tömänäni inänite waadete pönëninque godö waa cæmini bacæte ante cæedäni.

⁸Mänömaï wede pönëninque tæï ongöninque waadete pönëninque Wængongui nänö cædö ante godömenque godömenque entawente cæmini ininque minitö mönö Awënë Itota Codito ingante ate bai në pönëmini inte edæ tömengä beyæ mini cæquënëno ante oda cæte wædämaï imaiminipa. Wæætë edæ awæ nanguï inca bai minitö adobaï mini cæquënëno ante do cæcæminimpa. ⁹Wæætë mäninö tömänö ante entawënamäi ingä guiquënë tömengä möwoyata bai ëmönongä inte inguipogaque waa adinque öönædë iñömö gobæ i ædö cæte aquingäa. Tömengä nänö wënæ wënæ cægainö ñä do mënongate impa, ante pönënamäi inte önonque quëwengampa. ¹⁰Iñänäni ëñeedäni. Wængongui minitö iminite do apænte æninque aa pegacäimpa cæminii. Minitö, Wængongui nänö änönonque ante ëñente entawëninque mönö cöwë tæï gongænte ongongæimpä, ante nanguï cæedäni. Edæ mänömaïnonque ante cæmini inte minitö oda cædämaï inte tæï ongoncæminimpa. ¹¹Ayæ iincayæ ate nänæ wæmini ate mönö Awënë Odeye Itota Codito iñömö minitö iminite ææntodongä goyöminite tömengä, Pö guidäni, ante watapæ æmæwo manguicä guite cöwë quëwencæminimpa.

¹²Minitö mäninö ante do ëñëninque mini nö pönï ëñënö ante ædæmö entawente tæï ongömini incæte botö, Godömenque cöwë pönencæminimpa, ante cædinque adodö adodö ante apænebo ëñencæminimpa. ¹³Edæ botö, Minitö oda cædämaï inte cöwë pönencæminimpa, ante cædinque botö baonga botö quëwenganca wæætë wæætë apænedinque nö cæte apænebopa, ante pönëmopa. ¹⁴Edæ mönö Awënë Itota Codito botö imote

edonque apænedinque, Bitö oo pönï wæninque botö weca ææ poncæbiimpa, angacäimpa. ¹⁵Angä ëñengaimo inte botö, Nöwo botö yewæmöninö ante adinque entawëmini inte minitö iñömö botö gobo ate cöwë pönencæminimpa, ante cædinque ñöwo incæ tæï piñæninque nanguï cæcæboimpa.

**Itota Codito Tæiyæ Awënë
nänö ëmönö atamönipa**

¹⁶Mönö Awënë Itota Codito iñömö tæï piñängä ingä inte oo poncæcäimpa, ante minitö iminite apænedinque mönitö dicæ wadäni nani mä apænewëno ante apænetamöniiyaa. Wæætë edæ, Tömengä në Awënë inongä inte mönö Tæiyæ Awënë nänö ëmönö incæ ëmongampa, ante në agaimöni inte mönitö, Nawangä agamönimpa, ante apænemöni ëñëminitapa. ¹⁷Edæ Awënë nänö ñäo apæite bai ongöñömö ongonte apænedinque Mæmpo Wængongui incæ, “Iingä botö Wengä inongä inte botö në waadecä ingampa. Tömengä ingante adinque botö waa tobopa,” ante apænegacäimpa. Ayæ Itota ingante waa adinque tömengä në ñäo ëmongä ingante odömongä agamönipa. ¹⁸Änanquidi tömengä tæiyæ waëmö ëmonte nänö ongöñömö godongämæ ongöninque mönitö mäninö ante Wængongui öönædë tedecä ëñentamönipa.

¹⁹Wængongui beyæ në apænægainäni nani yewæmongainö bai mönitö adobaï edonque agaimöni inte, Nawangä iñonte yewæmongadänimpa, ante apænemöni ëñenguënëmini iminipa. Mäninö nani angainö wëmö iñömö ñäo apæite tica ënente bai i apa quëwëminii. Oque pönente iñonte, Wadaamö æængæimpä, ante wänö cönäni bai minitö adobaï mini ñäo entawënginque ante Itota Codito nänö ponguïönæ ante edæ wänö cöninque wede pönëmini ininque waa imaimpa. ²⁰Iñänäni ëñeedäni. Dodäni Wængongui beyæ në apænægainäni incæ, Wængongui æbänö ante apænecä ëñente yewæmonguimoo, ante pönëninque

dicæ mā pönëninque adodeque incæ yewæmongadāniyaa. ²¹Wīī nāmanque pönëninque yewæmongadānimpa. Wæætē Wængonguī Tæiyæ Waēmō Ōnōwoca nempo quëwëñōnānite tōmengā pōnō apænecā ëñëninque Wængonguī nānō apænëdonque ante apænëgadānimpa, ante ämo ëñëmäiminipa.

Në babæ odōmonte apænëdāni
iīmaī cædānipa, ante

2 ¹Doyedē pancadāniya, Wængonguī beyæ apænëbopa, äninque babæ apænëgadānimpa. Nōwo iñōmō wadāni adobaī awëmō cædinque, Mīni cabo oda cæte ëwente wæcæmīnimpa, ante cædinque babæ ante odōmonte apænëquināni mīnitō weca do ongōnānipa. Mōnō Tæiyæ Awënë incæ tōmënāni inānite æncæte ante nāmā wepæ nē godongaingā iñongante tōmënāni wæætē nāni quingæ òmæe ëwenguinque edæ Baa änānipa cæmīnii. ²Pancamīniya nanguī imīni incæ mīni guīñente wæquinque tōmënāni nāni wentamō mongænte goquīnō incæ tee empote goquīmīni imīnipa, ante awædō. Mānīnō godinque mōnō nōingā ëñëñōnō ante piīnte cæyōmīni wadāni adobaī māniī taadō nōinō iñonte godō babæ äninque wënæ wënæ änāni baquīnānimpa, ante awædō. ³Në babæ odōmonte apænëdāni iñōmō mīnitō māincoo ante ò æinëwente wæwënāni inte nāmāneque nāni pönëwënō ante tededāni ëñëninque mīnitō do oda cæyōmīnite tōmënāni wæætē ò æmäinānipa, ante awædō. Mōnō nē pangā ònoncadopo do ongongaināni inānipa. Mōnō nē pangā iñōmō, Ōo nāni ëwenguinque mānōmaī cædānipa, ante apænte ancæte ante piīninque edæ mōwo mōnāmaī mīingā inte a ongongampa.

⁴Anquedoidi incæ ëñëñāmaī cædāni ate Wængonguī ata cæpodāmaī ingacāimpa. Wæætē, Tōmënāni nāni apænte tente wæquinganca ontatodē wëmō mæe māmōnte baī iñōmō

guii tee mōnete ongoncædānimpa, ante cædinque tōmengā angā ëñente tōmënāni nāni owogaiñōmō tadōmengadæ pōni dobæ go guigadānimpa. ⁵Ayæ doyedē tōmengā nānō nē badongaīnāni inguipoga quëwëñōnānite Wængonguī tōmënāni inānite ata cæpodāmaī inte angā ate nē ëñëñāmaī ināni iñōmō edæ æpæmpo bete wængadānimpa. Wæætē Nōwee wodi Docā nāni änongå guiquënë, Mōnō nō cæte quëwengæimpa, ante nē apænëgaingā iñongante Wængonguī tōmengā tōnō tiæte ganca ināni mānimpodānique inānite wææ aacā quëwengadānimpa. ⁶Ayæ, Todōmä tōnō Gömoda iñōmō quëwënāni inānite, Mīni apænte wido cæquinque, ante tōmënāni quëwëñōmō iya tāninque wido cæcā gōnaiboque bate contagatimpa. Mānōmaī cædinque Wængonguī, Botō imote ëñëñāmaī imīni mīni adobaī tente wæquinque cæmīnipa, ante wadāni inānite odōmoncæte ante cægacāimpa. ⁷Ayæ ëñëñāmaī inte cædāni baonque towente quëwënāni adinque Dooto wodi iñōmō nē nō cægaingā inte, Wentamō pōni mongænte quëwënāni awædō, ante wædongā inte adoyōmō quëwëñongante Wængonguī tōmengā ingante tōō æmænte ò ængā beyænque quëwengacāimpa.

⁸Tōmengā waa cæquinque nō entawënongå inte tōmënāni weca quëwente ayongā iīmō iñō iīmō iñō ëñëñāmaī cædāni adinque tōmengā, Ancaa ate awædō, Ancaa ëñente awædō, ante wæwëñongante Wængonguī tōmengā ingante do ò ængā beyænque quëwengacāimpa. ⁹Mānōmaī cædinque Wængonguī, Botō miñæ nē pōnāni caate wædāni adinque botō do ëñente cædinque æmo ate quëwënānipa. Wæætē wiwa cædāni inānite botō apænte anguiōnæ ganca mō ongōnte baī māninque nōwo incæ wæætē wæætē pämo wædānipa, ante Wængonguī cæcampa. İninque, Nō ëñente Wængonguī cæcampa, ante mōnō edonque ëñengæimpa. ¹⁰Māniī babæ

ante nē odōmonte apānewēnāni iñōmō tōmēnāni baonque ante towēinente nāni entawēmāmo ante nē cādāni inōnāni inte edæ awēnēidi inānite, Wīi ēñēinē wædō, ante piinānīpa. Mānōmainō ante nē piinte ānāni inānite godōmenque pancæte ante Wængonguī mō ongonte baī mangampa. Tōmēnāni iñōmō nāmā ængō cædinque guiñēnedāmaī inte edæ nē ñāō entawente tæi ēmōnāni inānite godō wēnæ wēnæ apānedinque edæ babæ ante tedewēnānīpa.

¹¹ Iñæmpa anquedoidi tæi piñānāni inte godōmenque ñānānāni inōnāni incæ Wængonguī ayongante guiñēnete wædinque nē ñāō entawente tæi ēmōnāni inānite piinte apænte ānāmaī inānīpa.

¹² Nē babæ ante odōmōnāni guiquēnē tōmēnāni nāni nē adāmaī inō ante mā pōnēninque wēnæ wēnæ apānedinque babæ ante tedewēnānīpa. Babæidi ōmæwocādāni inte nāni togænte ecate ēwenguinque ōnonque pōnī cægōnāni baī nē babæ odōmōnāni iñōmō edæ adobaī ēñēnāmaī ināni inte tōmēnāni nāni wænguinque babæ cædinque quingāmē baī quēwēnānīpa. ¹³ Tōmēnāni wādāni inānite godō wīwa cādāni ininque iñāni wæætē nāēmæ godō cādāni wæcādānīmpa. Tōmēnāni iñōmō, Itadē incæ mōnō baonque pōnente towengæīmpa, ante cādānīpa. Mōnitō waadete pōnēninque godongāmæ cæñōmīni tōmēnāni adoyōmō pōninque cæowæō incædō beowæō incædō inte cæyōnāni wentamō nāni mongænō beyænque mīni cabo wæætē baate baī ēñāmīni bādinque wentamō tæ encaa tæ encaa ēmonte bamīni awædō.

¹⁴ Wacā onquiyængā awinca adinque cōwē godō towēinente wædāni inte tōmēnāni iñōmō ñimpo cādāmaī cōwē wīwa cæinente wædānīpa. Wacā aquīi piñānāmaī ingā adinque tōmēnāni, Mōnitō tōnō godongāmæ ponte wēnæ wēnæ cæcæcāīmpa, ante cædinque godō waa cæte baī babæ cādānīpa. Botō quī botō quī, ante nē æinente wædāni iñōnānite Wængonguī iñōmō,

Tōmēnāni nāni wæwocaincabo inānīpa, ante piinte angampa. ¹⁵ Taadō tōinō oda cædinque edæ docā Beodo wodi wengā Badāō wodi miñā tōmēnāni tee empote godānīpa. Tōmengā Badāō iñōmō, Nō cādāmaī imo incæte botō mǎincooque ante tobote, ante baī cægacāīmpa. ¹⁶ Tōmengā Wængonguī beyæ nē apānecā incæ ocāi ōmæcacā baī inte wapiticæ ēñēnāmaī cæyongante babetadecā iningā incæ bodo incæ iñontobæ wao baī tededinque Badāō ingante wææ angacāīmpa.

¹⁷ Māniī ñōwodāni nē babæ odōmōnāni iñōmō æpæ taquēñēñōmō æpæ dæ ā baī edæ ōnōnānique inte odōmōnānīpa. Boguīmancoo wīni cai mongænte ōnonque ænte poncoo baī tōmēnāni adobaī ināni inte ōnonque cādānīpa. Mānōmaī cādāni beyæ Wængonguī, Tōmēnāni nāni ongonte wæquīñōmō, ante mā māmōnte baī iñōmō badongacāīmpa.

¹⁸ Edæ tōmēnāni ogæ tededinque, Botō godōmenque waa pōnī cæbo aedāni, ante ōnonquedō ante tedewēnānīpa. Wādāni wapiticæ cæte quēwēnāni nempo adocanque wodo aamō cæyongante mānīnāni nē babæ odōmōnāni iñōmō, Bitō mōnitō miñā wæætē pōninque baonque bitō cæinēwēnō ante guiñēñādāmaī inte cæte tocæbiīmpa, ante waa cæte baī godō babæ cādānīpa. ¹⁹ Mīni ædæmō aamō cæte mōnedāmaī quēwenguinque mōnitō miñā pōedāni, ante babæ ānewēnānīpa. Incæte nē babæ odōmōnāni incæ tōmēnāni nāni wīwa cædonque beyænque cæte quēwēnāni beyænque nāēmæ ñā cæyænte baī inte wædānīpa. Edæ quiēmenque ante waocā ēñente cæcāā tōmengā mānīnō nānō ēñente cædō beyænque nē cæte quēwēnongā inte nāēmæ ñāō cæyænte baī inte wæcampa.

²⁰ Inguipoga ñōmænguēnēmāmo beyæ tee mōnete baī quēwēnīnāni inte tōmēnāni mōnō Awēñē Itota Codito mōnō imonte nē Ængaingā ingante do ate baī pōnēninque edæ abæ tawēnāni

inānitapa. Mānōmaī abæ tawænte godīnāni inte tōmēnāni inguipoga ante nāni cæinente wæpāmo beyænque wæætē adodō go goyo cæte ægodawate tæ wææntodonte baī wædāni īnīnque tōmēnāni godōmenque nāni wēnæ wēnæ wæwenguinque īmaīmpa. ²¹Nōinō taadō do adīnāni inte tōmēnāni nāni godōmenque wæwenguinque ēmō cæte godānīpa. Wængonguī tæiyæ waēmō nānō wææ angainō ante odōmōnāni nāni do ēñēnīnō ante Baa ante wadæ godāni īñōmō godōmenque wēnæ wēnæ nāni wæquinque impa. Īnīnque mānīnō taadō ante tōmēnāni cōwē adāmaī īnāni inte baī tōmēnāni beyæ godōmenque waa incædōnīmpa. ²²Tōmēnāni nōinō taadō ēmō cæte godīnāni nāni cædō baī ante īmaīnō ante nāwangā ante badete todānīpa. “Guinta awæ wēningā adodō cængampa. Odæ wængānā īñōmō æpæ pantate ate onguipoipæ wēango wēango nangampa.”

**Mōnō Awēnē wæætē adodō
poncæcāīmpa, ante**

3 ¹Botō nē waadedōmīni ēñēedāni. Mīnitō mōwo mōnāmaī inte nōingā ante pōnencāmīnīmpa, ante botō, Mānōmaī impa, ante mentaa yewæmōnīnque adodō adodō ante yewæmōmo aedāni. ²Tæiyæ waēmō entawēnāni Wængonguī beyæ ante apænedīnque nāni yewæmōngainō ante nē adīmīni inte mīnitō wæætē pōnencāmīnīmpa, ante cæbopa. Mōnō Awēnē mōnō imonte nē Ængaingā inte adobaī ante wææ angacāīmpa. Tōmengā nānō da godongaimōni īñōmō tōmengā nānō wææ angainō ante apænemōni ēñēmīni inte mīnitō wæætē adodō ante pōnencāmīnīmpa, ante cædinque yewæmōmopa.

³Īmaī ante tāno apænebo ēñencāmīnīmpa. Mōnō waocabo inguipoga mōnō quēwēmāmo wodo īnīnque bayonte nē badete todāni cōwē poncædānīmpa. Pōnīnque tōmēnāni badete todīnque nāmā nāni wēnæ wēnæ cæinēnō ante edæ do cæquīnāni

inānīpa. ⁴Tōmēnāni īmaī ante badete tocædānīmpa. “Codito nānō ponguīnque impa, ante wædānītedō abi. Īñæmpa Wængonguī nānō badongāñedē inguipo nānō cægāī baī mæmæīdi wodi wænte godāni ate nōwo ganca adobaī inte cæ apa guīñēwēmīnīi,” ante badete toquīnāni inte poncædānīmpa. Apænebo ēñēedāni. ⁵Wængonguī īñæmpa adodeque angā beyænque oōnædē owocoo edæ do bagatīmpa. Adodeque angā beyænque onguipo æpæ tæcæpæno odæ yate ongōñonte tōmengā æpæ tōnō badongā ongōmpa. Mānōmaī impa, ante edonque ī incæte tōmēnāni, Mōnō Baa angæīmpa, ante beyænque adāmaī inte baī pōnēnāmaī inānīpa. ⁶Ado æpæ inguipoga mæ ā beyænque Nōwee wodi quēwengāñedē māninguipo nānō ingāī dæ badīnque waguipo baī bagatīmpa, ante edæ nōwodāni īñōmō adobaī pōnēnāmaī inānīpa. ⁷Ayæ adobaī Wængonguī adodeque angā beyænque oōnædē owocoo tōnō īinguipo nōwo mīni cægonguipo edæ iya tanguinque ongōmpa. Tōmengā, Botō imote nē Baa ānāni inānite botō apænte pante wido cæquīōnæ ganca mānīī oōnæ tōnō īinguipo ongōmpa, angampa.

⁸Botō nē waademīni edæ ēñēedāni. Mōnō Awēnē ayongante adoōnæque incæ edæ, Mīido ganca wadepo baī impa, ante acampa. Mīido ganca wadepo īñonte mōnō Awēnē ayongante, Adoōnæque baī impa, ante acampa. Mānōmaīnō ante adodeque incæ mīnitō cōwē ēñente pōñēedāni, āmopa. ⁹Mōnō Awēnē, Cōwē pōnō cæbo æncāmīnīmpa, ante nānō angainō ante pancadāniya, Æiquedō mōnō Awēnē cæquīngā, ante wædānīpa. Mōnō Awēnē īñæmpa wīī wæntæye ingampa. Wæætē, Adocanque wænāmaī incæcāīmpa. Wæætē tōmānāni, Idæwaa wēnæ wēnæ cæte awædō, ante botō gāmænō poncædānīmpa, ante cædinque tōmengā mānīnō beyænque ee cædāmaī ingampa. Īnīnque tōmengā, Mīnitō wæætē botō gāmænō æiquedō ponguīmīnīi, ante wānō cōnīnque edæ ee pōnāmaī ingampa.

¹⁰Incaete nē awēmō ò aengā iñontobæ nānō pōmaī mōnō Awēnē nānō poncæ cæōnæ iñōmō adobai iñontobæ ponguīnō anguēnē. Nanguī tæi tæi tēnīnque òōnædē owocoo incæ iñontobæ dæ goquīnō anguēnē. Gongā nāni angā nanguī pōni bæco iñinque edæ Wængonguī nānō badongaincoo tōmancoo edæ aca podinque edæ ewente bacæimpa. Inguipoga tōmāo ongoncoo dæ ba iñinque inguipo ònōmæca pōni baquīnō anguēnē. ¹¹Tōmancoo edæ mānōmaī ewengūncoo que impa, ante adinque edæ mīnītō iñōmō, Æbānō quēwenguī, ante pōnēmīni. Wængonguī nānō cædō bai cōwē cædinque tæiyæ waēmō quēwenguēnēmō imompa. ¹²Wængonguī nānō ponguīōnæ iñōmō edæ aeyedēnō ponguī, ante wānō cōnīnque, Quingæ pōni pongæimpa, ante mōnō nanguī cæcæimpa. Māniōnæ iñonte edæ òōnæ incæ gongā bæcote ewente bayonte Wængonguī nānō badongaincoo incæ nanguī ocoi ānīnque tōmancoo aca podinque ewente baquīnō anguēnē. ¹³Picæōnæ tōnō pedanguipo òmæe ewēnīnque Wængonguī wæætē, Botō mīiōnæque tōnō mīinguipoque pōnō badoncæboimpa, ante nānō angainō bai do badoncæcæimpa. Iñinque mōnō iñōmō, Mīiōnæ tōnō mīinguipo iñōmō mōnō nō pōni cæte quēwengæimpa, ante nanguī ainente wæmompa.

¹⁴Botō nē waadedōmīni ēñēedāni. Mānōmaī bacæimpa, ante nē ainente wæmīni inte mīnītō iñōmō edæ, Mōnō māniñedē wentamō entawēnāmaī imō adinque Wængonguī piīnāmaī incæcæimpa, ante nanguī cædinque edæ nāmā wææ aaedāni. Ayæ tōmengā, Botō ayōmo waēmō ewocamīni iñinque edæ mōnō godongāmæ piyænē cæte quēwengæimpa, ante pōnō cæcæcæimpa, ante edæ nanguī cæedāni. ¹⁵Mōnō

quēwengūnque ante mōnō Awēnē edæ ee ongonte pōnāmaī ingampa, ante pōnēedāni. Wængonguī pōnō cæcā ate ocai nē encacā bate pōnēnīnque mōnō tōniñacā Pabodo mōnō nē waadecā inte adobainō ante mīnītō imīnīte edæ, Acemīnīmpa, ante yewæmongantapa. ¹⁶Wængonguī mōnō quēwengūnque ante ee pōnāmaī ingampa, ante cadota ante yewæmōnīnque Pabodo adobainō ante edæ cōwē yewæmongampa. Tōmengā nānō yewæmōnīnca pancataa wīi edonque i adinque nē ēñēnāmaī ināni tōnō aquīi piñænāmaī ināni iñōmō edæ oda cædinque wapiticæ odōmōnānīpa. Tōmēnāni edæ Wængonguī angā ēñēte nāni yewæmongainta tōmantaa adobai adinque tōmēnāni nāni æmæwo ewengūnque edæ wapiticæ odōmōnānīpa.

¹⁷Botō nē waademīni ēñēedāni. Mānōmaī impa, ante do ēñēmīni iñōmīnīte Wængonguī nānō wææ angainō ante ēñēnāmaī cædāni ināni guiquēnē mīnītō imīnīte tōō æmænte wapiticæ ante gocæ cædāni ate wædinque mīnītō wæætē tōmēnāni mīñæ godāmaī iedāni. Wæætē edæ Tæiyæ Awēnē nempo quēwēmīni inte, Tæi gowæænāmaī incæboimpa, ante nāmā wææ aaedāni. ¹⁸Mōnō Tæiyæ Awēnē Itota Codito aengā beyænque mōnō quēwēmompa. Iñinque tōmengā waadete pōnō cæcā ate mīnītō tōmengā ingante ate bai pōnēnīnque wadāni inānīte godōmenque waadete godō cæmīni baedāni. Tōmengā iñōmō edæ ñōwopāmo iñonte wapāmo mīimāmo iñonte edæ cōwē tæi emongā inongā inte ñāō apāite bai emongampa, ante adinque mōnō ñimpo cædāmaī inte tōmengā ingante cōwē waa acæimpa. Mānōmaī baquīnō anguēnē, ante botō, Amēē, āmopa.